

आकाशवाणी जयपुर-अजमेर
प्रादेशिक समाचार
दिनांक : 06.01.2026 समय : 18.45 बजे

- मुख्यमंत्री भजनलाल शर्मा कह्यो-एआई ऊँ देश री हिफाजत अर बरकत ने नुवा आयाम मिलेला अर नौकरी धंधा रा मौकां मांय ई बधोतरी व्हेला ।
- राजस्थान रीजनल एआई कॉन्फ्रेस मांय एआई-एमएल पॉलिसी अर नेशनल एआई लिटरेसी प्रोग्राम री सरुआत ।
- विकसित भारत जी राम जी अर चार नुवा श्रम कानूनां रा बारा मांय पीआईबी री ओर ऊँ जयपुर मांय क्षेत्रीय मीडिया सम्मेलन 'वार्ता' राखी ज्यो ।
- प्रदेश मांय जोरदार ठारी ऊँ जिन्दगी माथे असर पड़्यो-मौसम विभाग कुछ हलकां मांय शीतलहर चालण अर पारो और उतरण रा आसार जताया ।

000

मुख्यमंत्री भजनलाल शर्मा आर्टिफिशियल इंटेलिजेंस-ए.आई रे ज़रिए नौकरी-धंधा रा मौकां मांय बधोतरी रो भरोसो जतायो है। वे आज जयपुर मांय राखी ज्यो 'राजस्थान रीजनल एआई इम्पैक्ट कॉन्फ्रेंस 2026' अर 'डिजिटलफेस्ट' र समापन सत्र मांय बोल रह्या हा। श्री शर्मा कह्यो के प्रदेश मांय तकनीक ने बधावो देवण सारु ग्राम पंचायत लेवल माथे अटल लाइब्रेरी अर अटल स्टूडियो बणाया जा रह्या है। मुख्यमंत्री कह्यो के राज्य मांय 35 लाख करोड़ रुपया मोल रा करार मांय ऊँ 8 लाख करोड़ रुपया रा करार ऊँ जुड़्या काम सरु व्हे ग्या है। मुख्यमंत्री कह्यो के नौजवानां ने 1 लाख 56 हजार सरकारी नौकरियां देवण रो काम चाल रह्यो है।

कार्यक्रम मांय इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव वर्चुअल तरीका ऊँ शामिल व्ह्या। वे कह्यो के देश री जनता ने ए.आई. रो उचित इस्तेमाल रो सुबीतो मुहैया करावण सारु ए.आई. मिशन बणायी ज्यो है। श्री वैष्णव कह्यो के राज्य मांय 5 हजार नौजवानां ने लघु उद्योग भारती, सीआईआई अर आईसीईए री मदद ऊँ इलेक्ट्रॉनिक सामान बणावण ऊँ जुड़ी सिखावण दी जावेला। वे जयपुर मांय बेगो ई डेटा सेन्टर रा काम री नीव रखण रो ई ऐलाण कीनो।

कार्यक्रम मांय इलेक्ट्रॉनिक्स अर सूचना प्रौद्योगिकी राज्यमंत्री जितिन प्रसाद एआई ने जिन्दगी मांय मोटो बदलाव लावण वाळो बतायो। वे कह्यो के केन्द्र सरकार एआई इण्डिया मिशन सारु दस हजार करोड़ रुपया ऊँ बत्तो बजट राख्यो है। कार्यक्रम मांय राजस्थान एआई-एमएल पॉलिसी 2026 अर नेशनल एआई लिटरेसी प्रोग्राम समेत केई डिजिटल पोर्टल री सरुआत ई करी ज्यो।

0000

जयपुर री राजस्थान पुलिस अकादमी मांय 8 अर 9 जनवरी ने राज्य स्तर रो पुलिस सम्मेलन राख्यो जावेला। सम्मेलन मांय प्रदेश रा सगळा जिलां रा एस.पी., रेंज आई.जी. अर मुख्यालय रा मुख्यालय रा आला अहलकार शामिल व्हेला। ई दौरान राख्या जावण वाळा न्यारा-न्यारा सत्रां मांय पुलिस व्यवस्था अर विकसित भारत मांय पुलिसिंग सरीखा खास मुद्दां माथे राष्ट्रीय स्तर रा जाणकारां रा व्याख्यान व्हेला।

000

जोधपुर मांय केंद्रीय रिजर्व पुलिस बल-सीआरपीएफ रा 19 वां बैच री दीक्षांत परेड राखी ज्यो। इण रा खास पावणा विशेष महानिदेशक वितुल कुमार परेड री सलामी लीनी अर जवानां ने देश री अन्दरूणी हिफाजत सारु काम करण बाबत कह्यो। ई मौके बेहतरीन प्रदर्शन करण वाळा प्रशिक्षुआं रो मान ई कर ज्यो। जळसा मांय नुवा जवान देश सेवा री शपथ लीनी।

000

विकसित भारत जी राम जी अर चार नुवा श्रम कानूनां रा बारा मांय आज जयपुर मांय पत्र सूचना कार्यालय री ओर ऊँ क्षेत्रीय मीडिया सम्मेलन 'वार्ता' राखी ज्यो। सम्मेलन रा उद्घाटन सत्र मांय ग्रामीण विकास सचिव पुष्पा सत्यानी कह्यो के विकसित भारत जी राम जी रे ज़रिये मनरेगा ने और

बेहतर बनायी ज्यी है। सत्यानी कह्यो के देश ने सात 2047 ताई विकसित बनावण रा मकसद ऊँ विकसित भारत जी राम जी मांय तकनीक जोड़ी ज्यी है अर अब स्थायी निर्माण माथे ज़ोर दियो जावेला।

.....
सम्मेलन मांय उप मुख्य श्रम आयुक्त निरंजन कुमार चार नुवा श्रम कानूनां रा बारा मांय विगतवार जाणकारी दीनी।

000

भारतीय जनता पार्टी रा प्रदेश अध्यक्ष मदन राठौड़ कह्यो है के विकसित भारत गारंटी रोजगार और आजीविका मिशन यानी 'वीबी-जी रामजी' रे जरिये गांवांई हलका मांय नौकरी धंधा रा नुवा मौका बणेला। वे आज जयपुर मांय खबरनवीसां सागे बातचीत कर रह्या हा। राठौड़ कह्यो के ई कानून रा तैत अब साल मांय सवा सौ दिन री मजूरी री गारंटी दी जावेला जिण री मजूरी रो चुकारो सीधा संबंधित मजूर रा खाता मांय कर्यो जावेला। वे विपख कानी ऊँ नाम रा बारा मांय करी जा रही खिलाफत रा बारा मांय कह्यो के पैली वाळी सरकारां मोकळी योजनावां रा नाम बदल्या हा, जद के मौजूदा सरकार योजनावां ने सेवा अर सनातन ऊँ जोड़ी है। श्री राठौड़ कह्यो के भ्रष्टाचार रोकण सारू नुवी व्यवस्था मांय अंगूठो लगावण रे जरिये हाजिरी अर जियो टैगिंग सरीखी तकनीक काम ली जावेला अर सामाजिक ऑडिट जरूरी करी ज्यी है।

000

पाली ज़िला रा चोटिला अर आरे-सारे रा गांवां रा खेतां मांय कीड़ा मारण री दवाइयां रो छिड़काव अब ड्रोन री मदद ऊँ कर्यो जा रह्यो है। वठे रा किसानां रो कहवणो है के टेमसर असरदार छिड़काव व्हेवण ऊँ साखां री गुणवत्ता मांय सुधार आयो है, जिण ऊँ उपज अर आमदनी मांय बधोतरी रा आसार है।

000

विधायक निधि ऊँ रकम जारी करण मांय कथित भ्रष्टाचार रा मामला मांय आज जयपुर मांय विधानसभा री सदाचार समिति री मीटिंग व्ही। ई दौरान संबंधित तीन ई विधायक पेश व्हे र वां री बात रखी। समिति रा अध्यक्ष कैलाश वर्मा बतायो के अ विधायक सबूत रा तौर ऊँ पैन ड्राइव अर फोटो दीना है।

.....
000

प्रदेश मांय पड़ रही ज़ोरदार ठारी अर धुंअर रे कारण जिन्दगी माथे घणो असर पड़ रह्यो है। डूंगरपुर मांय सब ऊँ कम 3 डिग्री सेल्सियस तापमान दर्ज करी ज्यो। सिरोही मांय 4 दशमलव 1, माउंट आबू मांय 4 दशमलव 4, पाली मांय 9 दशमलव 7, श्रीगंगानगर मांय 5 दशमलव 1 अर राजधानी जयपुर मांय 6 दशमलव 8 डिग्री सेल्सियस न्यूनतम तापमान दर्ज करी ज्यो। श्रीगंगानगर समेत केई हलकां मांय घणी धुंअर रही। श्रीगंगानगर मांय घणा कोहरा रे कारण कम निजर आवण ऊँ आवण-जावण माथे असर पड़्यो। मौसम विभाग रे मुजब राज्य मांय आवता एक सप्ताह ताई मौसम सूखो रहवण अर आवता दो-तीन दिन मांय उतराद हलका रा कुछ हिस्सां मांय सीळी लहर चालण अर पारो 1-2 डिग्री सेल्सियस और उतरण रा आसार है। ई सागे ई कुछ हलकां मांय संवारे री बगत घणी धुंअर रहवण री संभावना है। इण ने ध्यान राखता थकां गाड़ियां सावचेती ऊँ चलावण री राय दीरीजी है।

000

राजस्थान युवा अर खेल महोत्सव 2026 काल जयपुर रा सवाई मानसिंह स्टेडियम मांय सरू व्हेला। युवा मामलात् अर खेल विभाग री ओर ऊँ राख्यो जा रह्यो ओ महोत्सव 12 जनवरी ताई चालेला। विकसित भारत-विकसित राजस्थान री सोच ने सांची करण मांय नौजवानां री भागीदारी बधावण सारू ओ महोत्सव राख्यो जा रह्यो है।

000

केंद्रीय माध्यमिक शिक्षा बोर्ड-सी.बी.एस.ई. इम्तिहान ऊँ जुड़्या तनाव रो सामो करण सारू विद्यार्थियां बाबत् मनोवैज्ञानिक परामर्श सहायता सरू कीनी है। मैट्रिक अर 12वीं रा उम्मीदवारां सारू मुफ्त राय ई साल एक जून ताई ली जा सके है। विद्यार्थी मुफ्त नंबर डायल कर र हिंदी अर अंग्रेजी मांय चौबीस ई घंटा मदद ले सके है। सी. बी. एस. ई. री ओर ऊँ 17 फरवरी ऊँ इम्तिहान सरू कर्या जावेला।

000

मकर संक्रांति रा सिलसिला मांय प्रदेश मांय केई ठौड़ां पतंग उड़ावण रो दौर सरू व्हे ग्यो है। इण ने ध्यान राखता थकां प्रशासन पतंग उड़ावण रा धारदार चाईनीज अर सिंथेटिक डोरा री बिक्री अर काम लेवण माथे रोक लगा दीनी है। म्हाणी अजमेर खबरनवीस बतायो के प्रशासन जनता ऊँ सुरक्षित अर वैध डोरा काम लेवण री

अरज कीनी है। ब्यावर मांय गाड़ियां चलावण रे दौरान हिफाज़त सारू गाड़ियां माथे सेपटीगार्ड लगाया जा रह्या है।

.....
000

उत्तर पश्चिम रेलवे ने बेहतर काम सारू 3 शील्ड दे र नवाज़ो जावेला। रेल मंत्री अश्विनी वैष्णव रो 9 जनवरी ने दिल्ली मांय राख्या जावण वाळा 70 वां अति विशिष्ट रेल सेवा पुरस्कार समारोह मांय अ पुरस्कार देवण रो कार्यक्रम है। उत्तर-पश्चिम रेलवे ने गोविंद वल्लभ पंत शील्ड, वैगन मेंटेनेंस शील्ड अर आबू रोड रनिंग रूम शील्ड दे र नवाज़ो जावेला। ई सागे ई उत्तर पश्चिम रेलवे रा 6 कर्मचारियां ने ईनाम दे र नवाज़ा जावेला।

000